

醫方集宜卷十目錄

外科門



醫方集宜卷之十

外科

瘡科總論

夫癰疽瘡瘍者皆繇氣血不和喜怒不時飲食不節
寒暑不調使五臟六腑之氣怫鬱於內以致陰陽乖
錯氣血凝滯而發也夫癰疽之疾多生於膏粱富貴
之人以其平昔所食肥膩炙燂安坐不勞嗜慾無節
以致虛邪熱毒內攻煎熬氣血而成也癰者壅也大
而高起屬乎陽六腑之氣所生也其脈浮數疽者沮
也平而內發屬乎陰五臟之氣所成也其脈沉數瘡



者其總名也癰者有頭小瘡也經云諸痛痒瘡皆屬心火蓋心主血而行氣若氣血凝滯挾心火之熱而生癰疽之類也夫癰發於六腑若燎原之火外潰肌肉疽生於五臟沉澁難療若陶室之燧內消骨髓癰則易療而難瘥疽則難療而易痊諸瘡之中唯背疽疔瘡最為急症其次莫如腦疽腸癰喉癰之類亦其急者也至若瘰癧懸癰痔漏諸瘡其症可緩而治也又有疥癬癰瘡風疖之類其輕重緩急自有不同也凡人年四十以上頭項鬢頭背脊腰脇或筋骨之上所視不見之處稍有瘡癰便不可輕易待之若怠慢

以為常疾每見從微至著喪命者多矣須宜急速治之庶幾得救凡瘡未破毒攻臟腑一毫熱藥斷不可用若已破潰臟腑既虧飲食不進一毫冷藥亦不可用此先後次第之要訣也夫瘡有五善七惡不可不辨以上所論大綱其諸症候治法別論於後

形證

夫癰之形其發暴甚皮膚光軟腫痛而高大者癰也疽者其發猛惡出自肌骨初生一頭形如瘡癰白色焦枯觸之而痛應心者疽也

五發者謂發背發腦發鬚發眉發頤是也人之一身

血氣周流而無間稍有壅聚莫不隨所至而發焉
故名五發

疔瘡者皆由臟腑積受熱毒邪風相搏於經絡之間
以致血氣凝滯注於毛孔手足頭面各隨五臟部
分而發也初發之時形如粟米或疼或痒遍身麻
木頭眩寒熱時生嘔逆甚則四肢沉重心驚眼花
蓋疔初發時尖起如疔故謂之疔此瘡含蓄毒氣
突出寸許痛痒異常一二日間害人甚速是尤在
癰疽之上也其白疔發於右鼻赤疔發於舌根黃
疔發於口唇黑疔發於耳前青疔發於目下蓋取

五色之應五臟各有所屬部位而然也或生於肩背或生於腰胯發無定處如在手足頭面骨節間者最急其餘猶可緩也又形有一十三種外科精義已明但瘡形黑陷內流清水而運黃腹痛惡心者必難治矣

腸癰者是氣血凝於腸胃之間結而不散發為癰腫其症小腹腫硬如掌抑之則痛小便澀如淋時有汗出惡寒腹皮緊急轉側有水聲或遠臍生瘡是其症也

乳癰者是乳房腫硬由血凝氣滯或因忿怒傷肝或

因積熱不散乳汁不行結為腫痛或乳口之氣吹而焮熱結成腫痛惡寒發熱是名吹乳又有婦人素有積憂結成隱核如蟹棋子大不痒不疼或五年始發為瘡破陷空洞名曰乳癌此難治之疾也

便癰是血疝也俗呼為便毒言於不便處腫痛故為便癰也乃是肝經積熱氣滯而然

囊癰者是陰囊上紅腫連小腹痛多因肝經濕熱滲入膀胱以致氣凝滯或受寒邪結而不散氣不能上升鬱而為熱濕熱相蒸污濁而成膿矣惟好飲

酒及怒氣人多有之

骨疽乃是肢上伏肉間痛不能轉側按之應骨作寒作熱皮色如常但微急如肥者是也此症多因夏秋之月卧露受寒使氣不能發散以致伏結附骨久為癰疽之患也又有石疽緩疽與附骨疽亦相類但形症少異耳

流注是鬱抑之氣結而不散發為腫塊作痛肉色不變亦無頭粟或腫或消流注不定者是也

瘰癧是結核生於頸項胸腋之間初如豆粒漸若梅李累累相連病則憎寒壯熱久而不散潰爛為膿

此病多因忿怒氣逆或感風熱之邪傷於肝經故
今筋結而為腫也若婦人久患瘰癧經閉久而變
生寒熱咳嗽而成癆瘵之病者多矣

癭瘤之症皆因恚怒所生使氣血凝滯結而成癭者
多生於肩項皮寬不急虛軟而垂是也瘤者隨氣
瘤注初如梅李皮嫩而光漸如杯大是也癭名有
五肉色不變謂之肉癭筋脈現露謂之筋癭赤脈
交絡謂之血癭隨怒而消長謂之氣癭堅硬而不
移謂之石癭瘤亦有六種脂瘤即粉肉瘤血瘤膿
瘤骨瘤即筋石瘤名雖不一亦無痛痒切不可決



破恐膿血崩潰必致傷人大抵癰瘤之類惟氣瘤
脂瘤可以攻療餘則難治矣

脫疽是疔生於足指潰而自脫故名脫疽生於手
者名為蛀節疔重者腐去本節輕者筋攣

痔漏初起生於肛門邊或如鼠乳或結小核痒痛注
悶或身熱惡寒此症皆由酒色過度肥甘久嗜醉
飽入房勞擾血脈結聚肛邊腫硬成毒膿潰日久
而為漏矣

膝癰是濕熱之毒結而不散其症膝腫紅痛惡寒發
熱當祛散其濕熱否則膿潰必為殘疾矣大抵膝

癰與鶴膝風皆因腎氣虧虛寒濕之氣所襲多成
此疾宜治之早若失治則為彎曲偏枯之患也
鶴膝風是兩腿腫大作痛腿愈細而行步難也
凡癰疽有五善七惡

○五善者

動息自寧飲食知味一善也

大小便調勻二善也

膿潰腫消色鮮不臭三善也

神氣精明語言清朗四善也

體氣和平五善也

○七惡者

煩躁腹痛渴甚瀉利小便如淋一惡也

膿血大泄焮痛尤甚臭惡難近二惡也

喘粗短氣恍惚嗜卧三惡也

未潰先黑久陷面青唇黯便污者四惡也

肩項不便四肢沉重五惡也

不能下食服藥而嘔食不知味六惡也

聲嘶色脫唇鼻青黑面目四肢浮腫七惡也

更有氣噫否塞欬逆身冷自汗無時目瞪耳聾恍

惚驚悸語言錯亂皆是惡證也五善見三則吉七

惡見四必危若五善併至則吉而安七惡全見則危而死

辨有膿無膿色

凡癰疽之處大按乃痛者膿深也小按之便痛者膿淺也按之不甚痛者未成膿也按之即復起者有膿也按之不復起者無膿也若腫高而軟者發於血脈腫下而硬者發於筋骨肉色不相變者發於骨髓也

時毒是感因時不正之氣初發狀似傷寒其症發於頭面耳項咽喉赤腫無頭或結核有根令人憎寒

發熱肢體疼痛甚則咽喉悶塞鼻塞痰壅六七日間乃能殺人治之宜速也

脈法

脈訣云諸脈浮數者當發熱若無熱而反惡寒身有痛處者必發癰也

又云脈滑而數數則為熱滑則為實滑主榮而數主衛榮衛相逢結而為癰又云數脈時見則生惡瘡

治法

丹溪云癰疽之症而作痛者有寒熱虛實皆能為痛因寒結而痛者宜用溫熱之劑以散之因熱結痛者

宜用寒涼之劑以折之因虛而痛者宜補之因實而痛者宜瀉之因風而痛者除其風因濕而痛者導其濕燥而痛者潤之塞而痛者通之怫鬱而痛者開之惡肉而痛者去之陰陽不和者調之切勿概用涼藥以凝其血況血脈喜溫惡寒若冷氣內鬱則疾難治

治癰疽法

一瘡瘍初發焮腫赤痛發熱便秘脈沉實者宜下之用黃連內疎湯當歸連翹飲清涼飲

神仙救苦丹

一瘡瘍初發微腫身體拘攣惡寒者宜用十宣散

托裏散

一癰疽初起見頭粟或痒或麻木者邪氣盛也可用
隔蒜灸法

一瘡瘍腫高作痛脈浮者宜托之用 內托千金散

仙方活命飲

一項背之間或腫痛無頭者宜用 內托流氣飲

一癰疽腫高色赤而作痛者屬陽易治宜用清涼解

毒之劑

一癰疽平陷色白但拘攣而不大痛者屬陰難治宜

用溫補內托之藥 托裏溫中湯

治瘡瘍法

凡瘡瘍未破毒攻臟腑熱藥不可多用宜清涼內托解毒為主

一瘡瘍初起可用箍藥圍住庶不腫開潰大宜用

烏龍膏 箍藥

一瘡瘍發熱煩躁作渴者宜用 黃芪竹葉湯

一瘡瘍久不潰而膿不出者宜內托大補其膿自潰

宜用 蠟礬丸

一瘡瘍發熱作嘔吐者宜用 解毒護心散

一瘡瘍初起紅腫身倦作熱者宜微微表汗以疎毒